



GAAGIIGIDOWIN OMAA ONJI GICHI-ABIWINING

Mii owe Gaa-baakinigaadeg Nising Gaa-maamawindiwaad
owe Niimidana ashi Nising Gaa-inaakonigewaad

Gashkadino-giizis Midaaswi
ashi Nishwaaswi gaa-inangizod,
Niizho Niishtana ashi Naanan

Manitoba 



Ogii-biidoon mii awe:

Gaa-niigaaniigaandang Anita R. Neville, P.C., O.M.

Aanike-gichi-ogimaakwe owe Akiins Manidooba

Mazinaakizigan Gaa-mazinitood:

Giba'igan: Churchill Summer

Dibinayi'ii Gaa-bimendang Gaa-bimaasing Gaa-maamawindiwaad,

Miigwech izhi Gaa-bimi-ayaang omaa Manidooba

Omaa Onji Ashodamaagewin Izhi Ji-niigaanishkaaying

Owe giga-maajitoomin ji-manaadendamang gaa-manidookaajigaadegin mii onow gaa-gichi-inendaagwakin aki zhigo nibiin, zhigo noongom omaa gaa-niibawiyang gichi-aya'aag gaa-gii-bimosewaad nitam wedi oodaanaang.

Ni-nisidawinawaanaanig ongow Anishininiwag, Omashkiigoog, Jibwayaanag, Bwaanag, Wiisaakodewininiwag, Eshkiimeg zhigo Anishinaabeg gaa-inakaaneziwaad gaa-gii-baakisitamowaad owe miikana mii owe noongom gaa-izhinikaadeg Manidooba – gakina gidagwii'igoomin omaa gaa-okwa-ayaaying.

Omaa apan niizhwaaki gaa-izhiseg, gigii-bi-waabandaamin epiichi-migoshkaadendaagwak gegoo. Owe gichi-aki Kaanada gaa-ogimaawiwaad gii-gagwe-zegimigaazowag. Niizhoweg onjiigodaadiwag mii owe gaa-meshkwadoonigeng. Zhigo omaa gaa-gii-ishkwaa-niibing, gii-gichi-izhise mii owe gaa-gichi-zakideg gaa-gii-nagadamowaad ongow nisimidana ashi naanan daso-midaaswaak obimaadiziig aandi gaa-gii-ayaawaad – zhigo gii-gichi-baate.

Mii onow gaa-migoshkaadendaagwakin ogii-zanagi'aawaa' onow gaa-inawendiwaad, gaa-okwa-ayaawaad zhigo gidakiinsinaang gaa-biminamowaad agindaasowinan, ambe mii go geyaabi ji-gwayakinamaang mii owe aaniin ge-izhi-agimind a' zhooniyaa omaa nitam gaa-inanokiiyaang.

Esa gaaw'n gwayak, ongow gaa-gii-wani'angidwaa niizh Manidooba gaa-izhi-dibendaagoziwaad gaa-gii-gichi-zakideg. Noongom gaa-giizhigak gi-mamikawisemin Sue zhigo Richard Nowell zhigo miinawaa gi-gichi-inenimaanaanig ji-aanjinikaadamang mii owe aazhogan bimijayi'ii gichi-miikanaang Niswaak zhigo Midaaswi ashi Niswi wedi Lac du Bonnet.

Aya'aa gaye gi-mamikawisemin Marina Simard omaa onji Waanibiigaaw-ziibiing. Zhigo awe Zhimaaganish Brianne Bartmanovich gi-gichi-inenimaanaan gaa-gii-zoongide'ed awe gaa-gii-niigaanitood obimaadiziwin ji-ganawenjiged.

Mii onow gaa-gii-bi-migoshkaaji'igoyang da'igwach gigii-bi-mashkawigaabawimin, nawaj gigii-bi-wiidanokiindimin daabishkoo Bezhig Manidooba.

Aazha ngii-aanikoosimaanaanig gegaa niso-midaaswaak zhigo naanwaak oshki-aya’aa gaa-naagaji’aawaad odaakozi’ niigaan ji-danakamigiziwaad, ingodaaswi ngii-baakinaamin oshki-aya’aa nitam ji-naagaji’ind aakoziwigamigoonsan, aandi imaa ge-ozhibii’igeyin naanaagadawenjiganiwaabikoonsing ji-waabamigooyan omaa aakoziwigamigoonsing, zhigo ngii-maajitoomin ji-anokaadamaang oshki-aya’ii Ji-ganawenimindwaa Awiyaag Waakaa’iganing omaa Lac du Bonnet, Arborg, zhigo Transcona.

Ngii-naazhinaamin gaa-inangidegin ongow onji gaa-inawendiwaad ji-aapiji-giishkinamaang mii owe waasigani-bimide diba’igewin, ingo-aki ngii-mashkawaakwajidoomin mii owe waasigan zhigo ngii-aazhetoomin gaa-inangidegin waakaa’iganan.

Ngii-izhichigemin ongow gaa-okwa-ayaawaad gwayak ji-bimi-ayaawaad gakina, gii-minosemagad ji-maajiinizha’angidwaa ingodwaak obimaadiziig omaa onji niibowa bagwaanegamigong gaa-ayaawaad izhi waakaa’iganing zhigo ngii-miigiwemin zhooniyaa ji-naagajichigewaad ongow zhimaaganishag zhigo gwayak ji-ganawenimindwaa obimaadiziig ge-izhi-ondiziyaang neyaab.

Mii owe gaa-gii-bimi-ayaamagak niizhwaaki apane gigii-bi-gikino’amaagoomin mii owe onji: gaaw’n wiin eta gidaa-zhaaboshkaasiimin onow gaa-zanagakin owe izhi ji-wiidanokiindiyang – owe dash gaa-maamawanokiiyang, gichi-gegoon gidaa-gashkitoomin.

Niizhwaaki apane, awegwen gaa-gii-inendangiban mii owe aapiji niibowa ji-ozhichigaazod zhooniyaa wedi Churchill?

Mii owe gaa-michaag zhigo gaa-gichi-inendaagwak ekwaak igo Kaanada gaa-anokaajigaadeg maagizhaa ji-izhiseg ji-boozitooyang Kaanada gaa-ozhichigaadegin wedi izhi agaamakiing gaa-adaawewaad.

Zhigo ongow obimaadiziig omaa Manidooba odebwetaanaawaa owe wiiichigewin, gegoo gaa-gichi-inendaagwak noongom izhise, omaa biinjayi’ii Obimaadiziig Odwaakaa’iganiwaa.

Ingodwaak zhigo naanimidana ashi naanan daswaaki apane Manidooba gaa-maajii-wiiji’iwewaad mii omaa gaa-maamoojichigewaad, Gichi-abiwin Gaagiigidowin da-anishinaabewibii’igaade, mii owe gaa-gii-wiindang gidakiinsinaan.

Owe gaa-bimijigaadeg gi-gichi-inendami’igomin ji-okwa-ayaaying mii omaa Manidooba.

Mino-ayaawin Gaa-naagaji'aad Odaakozi'

Aazha niizhwaaki gi-bimitoomin mii owe mino-ayaawin ji-mazina'ige'angidwaa ongow odanokiig zhigo ji-meshkwajitooyang anokiwigamig gaa-izhi-bimaadiziwaad.

Mii go zhigo wedi ji-izhi-dagokiiyang ji-oshki-maajitooyang mii owe gwayak ji-ganawenimindwaa, awashime gwayak ongow odaakoziig ji-moozhitoowaad mii iwe gwayak gaa-meshkwajisenig.

Aapiji gwayak ji-onji-ganawaabamindwaa ongow odaakoziig zhigo odanokiig owe izhi ji-ayaamowaad mii owe gwayak ji-ganawaabamindwaa mazina'igan ji-aanikoojigaadeg mii omaa gaa-inaakonigaadeg ji-ayaayan gegiin mii iwe mino-ayaawin.

Zhigo iga-boonitoomin mii owe bizhishig gaa-bi-izhichigeng mii owe onjida go awashime ji-zhaabonokiiwaad midaaswi ashi niizh daso-diba'iganens ongow aakoziwigamigong gaa-anokiiwaad, omaa nitam iga-onji-maajitoomin ongow mashkikiwikweg omaa niigaan gaa-anokiiwaad.

Gaaw'n wiikaa gidaa-boozisii gaa-ishpaasing awe gaa-biminang gaa-ishpaasing gaa-gii-anokiid odaanaang izhi odaanaang. Aaniish wiin ge-onji-izhaayamban omaa aakoziwigamigong gaa-naniizaaniseg omaa mashkikiwikweg gaa-gii-gagwejimindwaa mii iwe bezhigon.

Ga-inaakonaamin aaniin minik odanokiig zhigo odaakoziig ji-ayaawaad mii omaa niigaan ji-naagadawendamowaad mii omaa mino-ayaawin gaa-anokiitamowaad.

Owe oshki-aya'aa gaa-gii-asangid Ogitaadiziig Gaa-ganootamawaad, ingodwaak zhigo niimidana ashi bezhig awashime ogitaadiziig gaa-ayaawaad nibewinan zhigo oshki-aya'aag odanokiig gii-dagojigaazowag omaa waakaa'iganing gaa-ganawenjigaazowaad, ndazhiikaamin onow gaagimiziwe gaa-maazhichigemagakin gaa-gii-ozhitoowaad ongow odaanaang gichi-ogimaag zhigo ji-debwemagak gakina ogitaadiziig zhigo gaa-ganawenimigowaad owii-ayaanaawaa omino-ayaawiniwaa gaa-migoshkaaji'igowaad ji-noondawindwaa zhigo gwayak ji-dazhiikigaadeg mii go gegoo gaa-dazhindamowaad.

Bizaan igo giga-anokiitaamin gwayak ji-ganawenimindwaa mii omaa aakoziwigamigong, ongow ji-naagaji'igowaad niizh zhimaaganishag zhigo ingodwaak zhigo niishtana ashi ingodwaaswi Gaa-danakamigiziwaad Gaa-ganawenjigewaad ji-ayaawaad imaa gabe-ayi'ii omaa Health Sciences Centre gaa-izhinikaadeg, zhigo gaye nishwaaswi awashime gaa-danakamigiziwaad gaa-ganawenjigewaad da-ayaawag wedi Thompson, zhigo onowedi aanind gwayak ganawenjigewinan.

Aazha ngii-naabitoomin gaa-gii-booni-aabajichigaadegin mii onow mino-ayaawin mazina'iganensan onow onji gaa-mashkawaabiigakin gaaskiigino-mazina'iganan.

Noongom, ngichi-inendaamin ji-biibaagindamaang owe ji-ni-maaji-dagokiiyaang: naanaagadawenjiganiwaabikoonsing mino-ayaawin mazina'iganensan da-ayaamagadoon owe Gichi-manidoo-giizis.

Mii zhigo gidaa-gashkitoon ji-ondinamaazoyan mii owe mino-ayaawin bigo izhi ezhi-nandawendaman daabishkoo mazina'igan, gaaskiigin gemaa mazinaakiziganensan.

Owe Gichi-manidoo-giizis gaa-bi-izhiseg, giga-oshki-maajitoomin oshki-aya'aa onji odaakoziig aaniin ji-izhi-biindigewaad, ongow miinindwaa awiyag omaa Manidooba aaniin ji-izhi-gikendamowaad mii owe aaniin ezhi-ayaawaad.

Owe gaa-gii-dibaajimowaad ongow gaa-niigaanishkamowaad mii onow odanokiiwiniwaa, gaa-babaamiziwaad zhigo gaa-anokii'igewaad, niwii-agaanzitoomin onow gaa-ozhibii'igaadegin omaa onji gaa-aakozing gaa-aanikodoowaad gaa-gizigonigin ongow gaa-anokiiwaad gaa-inawendiwaad zhigo onzaam niibowa mazina'iganensan ji-mooshkinebii'amowaad ongow mashkikiiwininiwag.

Iga-ishpinaamin owe gaa-inakamigiziwaad mengwaa mashkikiiwan gaa-gwayaanjitoowaad odisigowaad mazina'iganensan onji mashkikiiwan, zhigo gaaw'n memwech gidaa-izhaasii mashkikiiwinini zhigo gidaa-moozhiganaanan omaa besho mashkikiiwan gaa-ondinaman mii onow mazina'iganensan onji ji-gibitinaman gaa-nitaawigid awiya, gaa-onjizhaazod gaa-izhi-miniiwiyan zhigo bangii gaa-aakoziyan. Iga-biinaanaanig mashkikiiwininiwag zhigo mashkikiiwan gaa-gwayaanditoowaad ji-niigaanishkaaying owe gaa-meshkwajitooyang gwayak ji-ganawenimindwaa odaakoziig.

Aazha gi-nagishkaamin owe gaa-noonde-izhichigeying ji-giizhitooyang minik
nishwaaswaak awashime onooganan zhigo ojiingwanan ji-maajizhigaazowaad mii
omaa Selkirk aakoziwigamigong zhigo nga-oshki-maajitoomin gwayak ji-biindiged
biga awiya Gaagimiziwe Gegoo Gaa-andone'amowaad Aakoziwin gemaa
Gaa-bookosegin Okanan ji-gikinoo'amawindwaa aaniin izhi ji-izhi-anokiitoowaad.

Ni-biidoomin nawaj ji-minoseg mino-ayaawin wedi izhi Zhaawanong zhigo
Giiwedonong Wiinibiig ongow odaanaang gichi-ogimaag gaa-gii-giba'amowaad
onow Gaa-naniizaaniseg Aakoziwigamigoonsan. Zhigo ngii-aanikoosaanaanig
niishtana ashi niizh awashime mino-ayaawin gaa-inanokiiwaad mii omaa
Seven Oaks Aakoziwigamigong, ngii-baakinaamin mii owe oshki-aya'aa
awashime ji-baakising aakoziwigamigoons zhigo ngii-aanikootoomin awashime
gaa-giishkizhigaazowaad omaa dazhi Concordia aakoziwigamigong, zhigo
ni-maajitoomin ji-ozhichigaadeg oshki-aya'aa Victoria Gaa-naniizaaniseg
Aakoziwigamigoons mii omaa Gichi-manidoo-giizis.

Bizaan igo n-niigaanishkaamin owe gaa-gii-ashodamaageyaang ji-gwayakisidooyaang
gitigaani-akiing mino-ayaawin. Aazha miinawaa ngii-baakinaamin owe Carberry
Gaa-naniizaaniseg Aakoziwigamigoons gaa-gii-giba'amowaad ongow odaanaang
gichi-ogimaag zhigo nga-maajitoomin owe gaa-wii-biboonong ji-ozhichigaadeg
oshki-aya'aa Gaa-naniizaaniseg Aakoziwigamigoons wedi Eriksdale onji ongow
naawayi'ii zaaga'iganing gaa-inawendiwaad.

Mii go zhemaag nga-gikinoo'amawaanaanig zhigo nga-mazina'ige'aanaanig
oshki-aya'aa ongow daabishkoo mashkikiwininiwag gaa-wiikoodaadiwaad
da-debishkinewag aaniish minik midaaswi ashi niwin ji-bi-abiwaad owe gwayak
ji-biindiged biga awiya ji-gikinoo'amawindwaa ongow Nitam Gaa-ganawenimaawaad
Daabishkoo Mashkikiwinini Gaa-izhichiged omaa Red River College zhigo bizaan
igo ni-bi-niigaanishkaamin omaa gitigaani-akiing owe ji-gikinoo'amawindwaa
ongow Gaa-niigaanishkaawaad Gaa-ganawenimaawaad Daabishkoo
Mashkikiwinini Gaa-izhichiged ge-izhi-mazina'ige'indwaa gakina.

Owe gaa-gii-ashodamaageyaang ji-biidooyaang nawaj ji-onizhishing mino-ayaawin onji ikwewag, zhigo neyaab ndazhegetoomin onow gaa-gii-maji-giishkizhamowaad mii ongow wedi odaanaang gichi-ogimaag, zhigo miinawaa ndaanikoosaanaanig awashime doodooshaaboo mashkikiiwikwewag ji-wiiji'aawaad ongow gaa-omaamaayi-ayaawaad zhigo abinoojiiyensag mii apii gaa-ojaanimisewaad, ji-mazina'ige'indwaa mii ongow gaa-wiiji'aawaad onow ikwewa' gaa-wii-ayaawaanid abinoojiiyensa' wedi Naawayi'ii Zaaga'iganing Waabanong Mino-ayaawin Gaa-niigaanishkamowaad mii owe nitam zhigo ji-azhe-miinangidwaa Ginoozhe-ziibing mii owe gaa-wiiji'indwaa gaa-nitaawigiwaad abinoojiiyag.

Apii gaa-biindigewaad ndoogimaawiinaan, Manidooba aapiji gii-gichi-noondesewag mashkikiwininiwa' omaa gichi-akiing. Aazha gibise owe gaa-gii-noondesewaad zhigo niizhwaak zhigo nishwaasimidana ashi naanan oshki-aya'aag mashkikiwininiwag ngii-aanikoosaanaanig apii igo Binaakwii-giizis Niizho Niishtana ashi Niswi, dago ingodwaaswi mashkikiwininiwag wedi onji Gichi-mookomaan-akiing zhigo geyaabi ndanokaadaamin ji-mazina'ige'angidwaa mashkikiwininiwag. Wedi odaanaang gaa-akiiwang aapiji niibowa mashkikiwininiwag gii-bi-ayaawag.

Mashkawizii-ondaadiziwin, naazhinigaadewan gaa-agindeg

Owe gaa-gii-izhiwebak miziwe, ngii-gashkitoomin ji-naazhinamaang gaa-mazina'igeyin, ngii-ozhitoomin awashime anokiiwinan zhigo ji-dediba'amang ondaadiziwin.

Ngii-naazhinaamin owe gaa-gii-ishpiseg gegoo gaa-agindeg gaa-gii-aapiji-giishkizhamaang waasigani-bimide gaa-diba'igeng, ngii-mashkawaakwajidoomin waasiganan gaa-inangidegin, ngii-giishkizhaamin gaa-diba'igewaad mii ongow gaa-awii'iwewaad zhigo ngii-ganawendamawaanaanig ongow gaa-dibendamowaad waakaa'iganan midaaswaak zhigo naanwaak daswaabik owe gaa-akiiwang onji zhigo miinawaa ge-akiiwang midaaswaak zhigo ingodaaswaak daswaabik owe onji Waakaa'iganan Gaa-dibendamowaad Gaa-dediba'amowaad gaa-gii-diba'amowaad neyaab ji-ondiziwaad.

Ngii-niizhitoomin owe gaa-gigishkawaawasod gaa-ondiziwaad ongow bangii
gaa-diba'amawindwaa gaa-wii-omaamaayi-ayaawaad zhigo ngii-michi-miinaanaanig
izhi ingodwaak ongow gaa-maamoojichigewaad ji-wiji'iwewaad dago ji-naazhingidenig
gaa-okwa-ayaawaad gaa-wiji'iwewaad daabishkoo ji-gikino'o'amawindwaa aaniin
ji-izhi-bagizowaad gaaw'n memwech ji-diba'igewaad abinoojiiyag wedi The Pas
zhigo onaagoshig gaa-izhichigewaad mii wedi Thompson zhigo Brandon.

Ngii-naazhinaamin onow gaa-inangidegin onow onji Manidooba babaamiziwinan
gaa-gii-giishkinamaang mii owe gaa-diba'amawindwaa gaa-diba'igewaad, zhigo
ngii-ozhitoomin niishtana ashi naanan midaaswaak oshki-aya'aa anokiiwinan onji
awiyag omaa Manidooba.

Bizaan igo ndoozhitoomin waakaa'iganan gaa-dediba'igaadegin. Apane igo
biindigewaad ndoogimaawiwinan, ngii-ozhitoomin ingodwaak zhigo niimidana
ashi niswi gaa-okwa-ayaawaad zhigo gaa-dediba'igaadegin waakaa'iganan,
ngii-aanikoodoomin ingodwaak miinawaa nibewinan ji-miinindwaa awiyag omaa
Manidooba ingoji ji-giizhooshinowaad, zhigo ngii-biidoomin neyaabi niizho
midaaswaak zhigo niishtana ashi niwin waakaa'iganan gaa-gii-giba'amowaad
ongow odaanaang gichi-ogimaag.

Mii owe zhigo nga-biindagitoomin oshki-aya'aa inakonigewinan ji-gibitinamaang
gaaw'n gwayak gaa-ishpinamowaad gaa-diba'amawindwaa zhigo ji-mashkawitooyaang
ongow gaa-awii'iwewaad gwayak gewiinawaa ji-debwetawindwaa.

Zhigo nga-babaa-gagwedwemin omaa akiinsing ji-gagwe-mikamaang aaniin izhi
ji-naasad zhooniyaa owe onji miijim.

Owe aapiji niibowa ji-ozhichigaazod zhooniyaa wedi Churchill daa-meshkwajigaade
gidoondaadiziwininaan ongow gaa-aanike-ayaawaad.

Ngikendaamin gaaw'n gegoo inakaaneziwin ji-ozhichigaadeg giishpin gaawiin
ayaasigwaa ongow Anishinaabeg Gaa-inakaaneziwaad, mii dash izhi gwayak
niwii-naazikaamin owe maagizhaa ji-izhiseg. Geget ji-wiidanokiimangidwaa ongow
Nitam Anishinaabeg zhigo Wiisaakodewininiwag, gwayak nga-ganawendaamin
mii owe Kaanada nitam Gichi-wiiyakwaan-Anishinaabe maamawichigewin izhi
inaakonigewining.

Wiidanokiimangidwaa ongow Gaa-michaagin Gaa-ozhitoowaad Gaa-dananokiiwaad zhigo Gaa-daki-ayaag Aaniin Ji-izhi-biindigewaad Gaa-okwa-ayaawaad, Manidooba Gichi-wiiyakwaan-Anishinaabe Maamawichigewin owii-ozhitoonaawaa mii owe ji-onizhishininig babaamiziwin zhigo aki ji-gaagiigidootooyang onji ji-meshkwadoonigeying wedi izhi Churchill.

Ji-ginwaatooyang owapii ji-booziijigaadegin gegoon gichi-jiimaanaang, niinawind nga-onisidoomin ji-naagadawaabandamaang mii owe maagizhaa ji-minoseg apii biboonong.

Giishpin mikamang gegoo ji-mashkawi-ganawendamang daabishkoo gaa-michaag ozhichigewin, gwayak giga-ozhitoomin weweni ji-michaaseg onow onji gaa-aanikootooyang zhooniyaa gaa-wiijichigaadegin onow gaagimiziwe gaa-izhiwebak miikanayan ji-aanikoojigaadegin wedi izhi mii ongow maawach gaa-gidimaagiziwaad abinoojiiyang biinjayi'ii gidakiinsinaang gaa-bi-ondosewaad waasa ishkoniganing ji-gashkitoowaad gichi-gegoo.

Manidooba odayaanaawaa owe gaa-gichi-andawenjigaadeg, gaa-wendangideg, gaa-biinak gaa-mashkawaadak waasigan mii ongow mazinaakebijigan gaa-anokiitamowaad zhemaag gaa-andawendamowaad. Mii onow ji-biminizha'amang gaa-gii-dibaajimotaagoyang Jim Balsillie, Kaanada gaa-niigaanitang gaa-inendang owe gaa-mikaajigaadeg, iga-miigiwemin zhooniyaa neyaab ji-ondiziyang mii owe ji-ozhitooyang zhigo ji-ganawendamang mii owe gidinendamowininaan gaa-dibendamang, ji-maajitooyang bezhigoweg Gaa-inendamokaazod Awiya gaa-osisijigewaad zhigo ji-debwemagak ongow awiyag omaa Manidooba ji-ondiziwaad omaa onji oshki-aya'aa naanaagadawenjiganiwaabikoonsing ondaadiziwin ji-onizhishing nawaj ogimaawiwin gaa-anokiitamowaad zhigo ji-mashkawiseg gegoo gaa-zaagitooyan ji-dibaajimosiiyan.

Ji-wiijitooyaang gidoondaadiziwininaan gaawiin ji-gashkitoosig gegoo Trump, nga-ozhitoomin oshki-aya'aa niizh gaa-maajiibijichigaadegin gizhibaasijiganag wedi Westman, biidooyang nishwaaswaak zhigo naanimidana owe gaa-apiitaadak ji-mashkawiseg waasigan naanaagadawenjiganiwaabikong ji-wiiji'iwemagak ji-gizhidemagakin endaaying apii igo gisinaamagak.

Ni-miigiwemin zhooniyaa ji-ozhichigaadeg gitigaani-akiing ondaadiziwin gaa-gii-
ishpinamawangidwaa ongow gaa-inaakonigewaad, owe izhi gaa-gichi-inendaagozid
awe zhooniyaa gaa-miigiweyaang zhigo ni-mashkawaakwajitoomin mii onow
Gichi-wiiyakwaan aki gaa-awii'iweng owe izhi niswaaki aazha.

Zhigo onow oshki-niizh Manidooba Gaa-gitigewaad Gaa-izhichigewaad Gaa-
niigaanitamowaad ozhibii'igewigamigoon wedi Virden zhigo Shoal Lake aazha
owiiji'aawaa' aapiji niibowa gitigewininiwa' zhigo gaa-ozhichigewaad. Zhigo
owe gaa-bi-ayaamagak gaa-akiiwang iga-ozhitoomin inaakonige-aabajichiganan
onji oshki-aya'aa Gitige-awesiiya' Ji-andawaabamaawaad izhichigewin ji-ni-
minogaabawimagak mii owe zhooniyaa ji-mashkawigaabawid onow bizhiki-wiiyaas
gaa-dazhiikamowaad zhigo gaa-michaatoowaad aaniin ge-izhi-gaachidinamowaad
mii owe zhooniyaan gaa-gii-miinindwaa.

Bizaan igo nga-gagaanzomaanaanig mii ongow Gichi-ogimaag ji-nanaakonaawaad
onow Chinese gaa-ishpanjigenid ji-naagaji'angidwaa ongow gookooshi-wiiyaas
zhigo ozaawaa-waasigani-bimide gaa-ozhitoowaad mengwaa naazikamaang
ji-gaganoonangidwaa owe onji ondaadiziwin ongow niizho maawach gaa-michaag
ondaadiziwin gaa-biminamowaad omaa akiing.

Ezhi-naazhitooyaang mii owe gaa-apenimangidwaa ongow Gichi-mookomaan-akiing,
ndishpatoomin mii owe gaa-miigiweyaang zhooniyaa wedi izhi endaawaad
gaa-dazhi-ombigiwaad mii ongow gaa-babaamiziwaad zhigo anokiiwinan
gaa-ozhitoowaad, odaapinamaang mii owe akiinsing gaa-diba'igeng mii omaa
onji gaa-ozhichigaadegin aabajichiganan zhigo ji-aanjitooyaang owe Gaa-agaasing
Gaa-babaamizing Ji-gagwe-izhichigeng Gaa-diba'igeng Gaa-ondizing. Zhigo
ndoozhibii'amaamin oshki-aya'aa mazina'igan-onaakonigewin onji onow
odamino-akiing ji-biindigewaad ongow Manidooba gaa-dananokiiwaad,
onaabatoonaawaa ongow odaanaang gichi-ogimaag omazina'igan-onaakonigewiniwaa
ji-wiidanokiimaawaad onow Texas gaa-dananokiiwaad.

Wiiba sa go nga-giizhitoomin owe miikana onji Wasagamack gaa-ishpaasing
gaa-booniimagak zhigo nga-wiidanokiimaanaanig ongow Rat Seine River, Pembina
Valley Water Co-op zhigo City of Morden ji-wiijitooyang gaa-wiinibiig gaa-ozisijigaadeg
miziwe bizaan igo ji-wiijitooyaang North End Water Treatment gaa-danakamigiziwaad
omaa Wiinibiig.

Miinawaa ge-akiiwang gaye nga-maajitoomin ji-niizhotooyaang owe Gichi-miikana Bezhig omaa onji Ontario diba'akaaning wedi izhi West Hawk Lake zhigo ji-maajitooyaang owe ji-mazinibii'igaadeg owe Carberry gaa-izhinikaadeg aazhogan mii omaa Gichi-miikanaang Naanan zhigo Bezhig.

Ji-minotooyang Gaa-okwa-ayaawaad Gwayak Ji-naagaji'indwaa

Aandi bigo ge-bimi-ayaayin omaa Manidooba ji-moozhitooyan gwayak naagaji'igooyan – endaayeg, odamino-akiing, naawi-oodenaang.

Owe zhooniyaa gaa-miigiweyaang owe onji zhimaaganishag zhigo gaa-okwa-ayaawaad gwayak gaa-ganawenimindwaa ogii-niisinaanaawaa mii owe maji-doodamowin mii owe nitam onji mewinzha daswaaki, aapiji ishpise mii owe maji-mashkiki gaa-aabajichigaadeg aazha odizhiwinigoniwaa wedi izhi gaaw'n gwayak ji-izhichigewaad zhigo ji-nishiwanaadakamigiziwaad omaa gaa-okwa-ayaawaad.

Owe gidinaakonigewininaan onji Gaa-ganawenimindwaa ji-meshkwajitooyang owe gaa-wiiji'indwaa ongow gaa-migoshkaaji'igowaad gegoo ikidomagad nitam gaa-nakwetamowaad odayaanaawaa daabishkoo zhimaaganish gaa-izhichiged ji-izhiwinaad awiyan gaa-aabajitoonid maji-mashkiki aandi ge-dazhi-wiiji'ind gwayak.

Omaa oshki-aya'aa Gwayak Ji-dazhi-ganawenimindwaa omaa Wiinibiig, ongow gaa-naagaji'aawaad odaakozii' oga-wiiji'aawaa' awiya' ji-baasonid gwayak, oga-ganawaabandaanaawaa wegodogwen anaamayi'ii gaa-migoshkaaji'igowaad zhigo oga-mikawaawaa' awiya' ji-wiiji'igowaad.

Oshki-aya'aa nibewinan ji-onji-baasowaad omaa Main Street Project oga-wiiji'aawaa' awiya' gaa-maajaawaad omaa onji Gwayak Ji-dazhiganawenimindwaa nitam ji-dagokiiwaad izhi gaa-andawendamang gakina – ji-baasowaad. Ayi'ii gaye ni-wiijitoomin ji-aanikoojigaadegin waakaa'iganan ji-gizhibaa-wiiji'indwaa omaa Main Street Project ji-biindiganindwaa waakaa'iganing awiyag baamaa gii-biindigewaad ji-dazhiikawindwaa.

Owe gwayak ji-naagaji'indwaa ji-bajiishkoodizowaad da-maadakamigad omaa Wiinibiig owe Gichi-manidoo-giizis gaa-bi-izhiseg, ji-wiijitoowaad mii owe gaa-nakwetamamowaad gaa-nagajiiwaad gaa-niigaanitoowaad zhigo ji-aanikoodoowaad ongow awiyag mii owe mino-ayaawin gaa-nandawendamowaad.

Onow gaa-gii-miigiweyaang zhooniyaa oga-wiiji'aawaa' awiya' omaa Manidooba gaawiin ji-aabajichigeshkiwaad zhigo ji-naniizaanasinog onow gaa-okwa-ayaawaad gakina awiya onji.

Gaaw'n wiin eta nga-nakwetanziimin izhi gegoo gaa-migoshkaaji'igowaad awiyag; nga-niigaanigaabawitoomin imaa gaa-bi-onjiiseg wiidanokiimangidwaa Zhimaaganishag omaa Wiinibiig zhigo Gaagimiziwe Zhimaaganishag ji-bekitooyaang gaawiin ji-ateg omaa maji-mashkiki zhigo ongow gaa-ozhitoowaad maji-mashkiki gaawiin omaa ji-ayaawaad, zhigo nga-ozhishimaanaanig ongow gaa-anokiitamowaad gaa-nakaadamowaad izhi Gagiikwewinini owe Dibaakonigewin owe onji maji-mashkiki gaa-inaakonamowaad.

Wiidanokiimangidwaa ongow Manitoba Keewatinowi Okimakanak, nga-izhichigemin ji-gibitinamaang nanandog maji-mashkikiwan ji-biindigemagasinog giowedinong ishkoniiganing gaa-miigiweyaang zhooniyaa ji-achigaadeg zhaabwaakizigan wedi giowedinong gaa-ishpaasing gaa-booniimagak.

Ndizhitoomin miikanayan gaawiin ji-naniizaanakin owe izhi inaakonigewin ji-bagidinigaadesinog miigaazoo-aabajichiganan imaa gaa-babaami-ayaawaad awiyag.

Ni-wiiji'aag ongow omaa gaa-ayaawaad Manidooba ji-ganwenimaawaad odinawemaaganiwaa' zhigo gaa-izhi-bimaadiziwaad owe izhi niswaak daswaabik ganawenjigewin neyaab ji-miinindwaa gaa-gii-diba'amowaad onow onji waakaa'iganan zhigo niizho midaaswaak zhigo naanwaak daswaabik neyaab ji-miinindwaa gaa-gii-diba'amowaad onow onji babaamiziwinan, zhigo da-maajiisemagad owe Manidoo-giizis gaa-bi-izhiseg. Zhigo owe gaa-izhi-niigaanishkamaang mii owe gaa-diba'wind awiya ji-meshkwajiseg gii-minose owe izhi nawaj gaa-mashkawaag Gaa-maji-doodamowaad inaakonigewin.

Gaa-bi-niigaanishkaagoyaang ongow gaa-nagajiiwaad omaa onji Kaanada Gaa-ganawenimaawaad Abinoojiiya' ni-ganawenimaanaanig ikwewag zhigo abinoojiyag naanaagadawenjiganiwaabikong, ni-mashkawitoomin aaniish owe Gaa-bishigwaamagakin Mazinaakizowinan Inaakonigewin, mii zhigo iwe maawach gaa-zoongaadak omaa Kaanada.

Nga-moona'aamin wedi Dauphin miinawaa ge-dagwaagig onji gibaakwa'odiiwigamig, Dibaakonigewigamigoons, ji-naniizaanasinog owe gidakiinsinaan, ji-wiiji'indwaa awiyag gaa-gwayaanjitaawaad ji-aanji-bimaadiziwaad zhigo neyaab ji-bi-azhegiwemagakin anokiiwinan omaa izhi Parkland gaa-gii-giishkizhamowaad ongow odaanaang gichi-ogimaag.

Ji-naagajitooyang Gidakiinaan

Ongo omaa gaa-ayaawaad Manidooba omoozhitoonaawaa mii owe aapiji zoongeseg mii owe gaa-izhiwebak gaa-gii-meshkwajiseg owe gaa-gii-niibing. Gii-ishkwaaseg owe gaa-gii-gichi-zakideg owe gaa-gii-niibing nisimidana daswaaki apane gidoogimaawiwininaan owe ndinendaamin ji-mashkawitooyaang aaniin ezhi-nakwetamaang gaa-gichi-zakideg.

Nga-dazhiikaamin mii owe gaagimiziwe gaa-gii-ishkwaaseg gaa-gii-gichi-zakideg ji-ganawaabandamaang gidakiinsinaan gaa-bi-odaapinamowaad, Nitam Anishinaabeg ji-wiidanokiimangidwaa, Anishinaabeg gaa-ogimaawiwaad, gaa-inaakonigewaad, zhigo agwajayi'ii gaa-maamookamigiziwaad gaa-gii-miinigowangidwaa odinendamowiniwaa gaa-bezhigowendaagwak Bezhig Manidooba gaa-nakwetamaang.

Ongow Gaa-nagajitoowaad Gaa-okwa-ayaawaad Gaa-dibaajimowaad gaa-dananokiiwaad anaamayi'ii Gagiikwewinini owe Aki zhigo Gaa-meshkwajiseg Gaa-izhiwebak oga-onisidoonaawaa ji-naagadawaabandamowaad ge-izhi-dibaajimowaad owe onji gaa-zakideg ji-gikenjigaadeg, gaa-zakideg ji-gibitinigaadeg zhigo ji-ashawizing, zhigo aaniin ezhiwebak agwajiing giishpin zakideg ingoji.

Gaawiin onizhishinzinoon ji-naazhinamang mii owe gaa-meshkwajiseg gaa-izhiwebak – ji-miigaadamang-sh wiin eta go.

Ndoonaakonigewininaan ayi'ii gaa-izhinikaadeg Miikana izhi Gaawiin Maji-gegoo Giizhigong ozisijigaademagad ji-miikwa'emagak wedi niigaan Niizho Naanimidana gaa-onji-ozhichigaadeg owe Manidooba gaa-biinak waasigan, owiijitoonaawaa gidoondaadiziwininaan, zhigo odoodaanaawaa gegoon gaa-onizhishingin zhigo gaa-dediba'igaadegin onji gakina gaa-inawendiwaad. Nga-bi-zaagijitoomin owe ndoonaakonigewininaan owe ziigwang, ji-inaakonigeyaang medas dash gaye.

Nga-ishpatoomin owe gaa-wii-ozhitooyaang Manidooba gaa-waasiganikewaad.

Owe onji zhooniyaa gaa-miinigaazod ji-naagadawaabanjigaadeg wedi gaa-dazhi-naagaji'indwaa awesiiyag nibiing wedi Churchill nga-gechinaa'omin waabamegwag, waabakwag zhigo nanaandog giwedining gaa-bimaadakin bizaan igo da-mino=bimaadiziwig owe izhi ombigiyaang ondaadiziwin zhigo ozhitooyaang anokiiwinan. Zhigo bizaan igo nga-ganawendaamin awashime onow akiin omaa Manidooba ji-minosegin gakina gegoo akiing, giizhigong zhigo nibiing.

Endaswaaki naanan midaaswaak daso midaaswaak obimaadiziig mawadishiwewag niibowa Manidooba odamino-akiing. Wedi odaanaang gaa-akiiwang ngii-izhichigemin gaawiin gegoo ji-inangideg ji-biindigeng odamino-akiing. Owe gaa-akiiwang, gidaa-waabanda'iwe epiichi-gichi-inendaman Manidooba odamino-akiin awe'igeyan owe onji oshki-aya'aa akiinsing odamino-aki gaa-izhi-mazinising bimibizonike-mazina'iganens.

Gakina Abinoojii Gichi-inendaagozi

Owe gaa-biboonong da-maajii-ozhichigaadewan niwin gikinoo'amaadiiwigamigoon, ji-ozhitoowaad Manidooba gaa-anokiiwaad, da-debishkinewag niiwaak zhigo niizh abinoojiyag ji-ganawenimindwaa wedi River East, Pembina Trails, Seven Oaks zhigo Brandon. Owe izhi gaa-oshkichigaadeg gaa-gikinoo'amaageng Zhaaganaashiimowin Ji-dago-gikinoo'amawindwaa zhigo gaa-bi-biindagichigaadeg mii owe gaagimiziwe abinoojiyensag daga ji-anamichigewaad, ngechinaa'omin abinoojiyag ji-wiji'indwaa zhigo ji-ayaamowaad aabajichiganan gaa-andawendamowaad ji-anamichigewaad.

Mii zhigo da-ayaawag gikinoo'amaadiiwigamigong nishwaaswaak oshki-aya'aa ogikinoo'amaageg, awashime da-debishkinewag abinoojiyag minik niiwo-midaaswaak zhigo niizhwaak ji-ganawenimindwaa, zhigo owe gaagimiziwe gikinoo'amaadiiwigamigong ji-ateg miijim, ni-wiji'aanaanig awashime abinoojiyag ji-gikinoo'amawindwaa zhigo ji-giizhitoowaad. Mii go zhigo wedi ji-izhi-dagokiiyaang ji-debibinangidwaa ongow gaa-gikinoo'amawindwaa gaa-zhaabwiiwaad owe izhi gaa-danakamigiziyaang ayi'ii gaa-izhinikaadeg "Debibizh Niigaan, Debibizh Ishpiming" gaa-wiijitoowaad gikinoo'amaadiiwigamigoon ji-wiji'aawaad gikinoo'amawaagana' ji-izhaanid.

Owe gaa-ni-onizhishing Gaa-inendamokaazod Awiya, nga-gaganoonaanaanig gikinoo'amawaaganag, oniigi'igoowaa', gaa-nagajiiwaad, zhigo gaa-gikinoo'amaagewaad ji-debwemagak gwayak ji-aabajichigaadeg gikinoo'amaadiiwigamigong, gaawiin wiin anoojigo ji-aabajichigaadeg.

Nga-ozisidoomin gaa-maamawinding onji gaagimiziwe gaa-gikinoo'amaagewaad owe Gichi-manidoo-giizis gaa-bi-izhiseg.

Bizaan igo anokiiyaang ji-wiiji'angidwaa Anishinaabeg Gaa-inakaaneziwaad neyaab ji-dibendamowaad abinoojiiyag gaa-ashamindwaa, ndibaajimowin miinawaa debwemagak owe gaa-wiiji-ashodamaageyaang ji-wiidanokiindiyaang Gaa-niigaaniigaandamowaad, gaa-anokiitamowaad, zhigo gaa-inakaaneziwaad gwayak ji-ganawenimindwaa abinoojiiyag.

Wedi odaanaang gaa-akiiwang nawaj bangii abinoojiyensag gii-nibowag apiich niizhwaaki apane. Awashime anokiiwin ji-dazhiikigaadeg aya'aag dash wiidanokiimangidwaa ongow oniigi'igoog, gaa-niigaaniiwaad gaa-naagaji'aawaad odaakozii', nga-niigaanishkaamin izhi maawach gaa-gichi-inendaagwak gaa-noonde-izhaayaang.

Ni-bizindawaanaanig oshkiwaadiziig, oniigi'igowaa', ookoyiwaa', omishoomisiwaa' zhigo gaa-gikinoo'amaagewaad omaa Manidooba. Owe nitam Bezbig Manidooba oshkiwaadiziig gaa-maamawindiwaad owe gaa-biboonong oga-miinaawaa' ishpi-gikinoo'amawaagana' ji-gashkitoowaad ji-dibaajimowaad odinendamowiniwaa zhigo ji-gikinoo'amaagowaad onow gaa-niigaaniinid gaa-gii-bakinaagewaad iwe gaa-gii-migoshkaaji'igowaad ji-minosewaad ezhi-wiijitoowaad gidakiinsinaan nawaj ji-onizhishininig.

Omaa Manidooba, abinoojiiyag zhigo oniigi'igowaa' aapiji dazhitaawag obimaadiziwiniwaan wedi gaa-dazhi-odaminowaad, zhooshkwaada'ewigamigong, bakitejii'igewigamigong. Gaa-gii-wani'ind midaaswi ashi niizhwaaswi gaa-daso-bibooned gaa-bapasijiishkiged Darius Hartshorne aapiji gashkendaagwad.

Ji-waabanda'iwemagak epiichi-wiiji'angidwaa odinawemaagana', ongow gaa-gii-odaminomaad zhigo gaa-okwa-ayaawaad wedi Sisler Ishpi-gikinoo'amaadiiwigamigong, nga-miigiwemin zhooniyaa ji-ategin oshki-aya'aa biinjiweba'ige-ozhibii'iganaatig zhigo abiwinan onji ongow Spartans ji-izhi-mamikawiseyang wiin onji.

Ogimaawiwin gaa-anokiimagak giin onji

Ndooshkitoomin mii owe Ji-gashkitoowaad Obimaadiziig omaa Manidooba inakonigewin ji-izhitooyaang Manidooba geget ji-gashkitood bigo gegoo bigo awiya omaa akiinsing.

Aazha gegaa ngii-izhitoomin Manidooba geget ji-niizho-gaagiigidowaad, zhigo wiiba nga-dibaajimomin wegodogwen gaa-gii-dibaajimotaadiyaang Gaa-wemitigoozhiimowaad niinawind. Owe Manidoo-giizis, nga-baakinaamin Gaa-wemitigoozhiimowaad gaa-dibaakonigewaad gaa-anokiitamowaad omaa St. Boniface zhigo nga-izhinizha'amawaanaanig Organisation internationale de la Francophonie owe gaa-nandodamawangidwaa.

Ndebwemin zhigo ndizhichigemin ji-aanjitooyaang owe gaa-izhi-ogimaakandamowaad omaa gakina gichi-gikino'o'amaadiwigamigong ji-mino-gikino'o'amawindwaa gakina gikino'o'amawaaganag omaa Manidooba.

Ni-manaanendaamin gaa-dibendaagoziwaad zhigo gaa-ogimaakandamowaad mii ongow gaa-inaakonigewaad zhigo ni-niigaanishkaamin ji-aanikoosijigaadegin onow gagiikingewinan omaa onji Gaa-ozhibii'igaadeg Inendamowin Aaniin Ji-izhibii'igaadeg Inakonigewin Nisimidana ashi Niizhwaaswi gaa-gii-ishkwaa-naagadawaabandamaang.

Gaa-maamakaadendaagwakin Gegoon Geyaabi Daa-izhisewan

Niizhwaaki apane, gi-mino-ayaawininaan gii-giiwashkwemagad. Ongow gaa-naagaji'aawaad odaakozii' gii-maajaawag niigaan gaa-dananokiiwaad. Noongom dash aapiji aazha neyaab biindigewag.

Niizhwaaki apane, gaa-wendaasigwaa zhigo ongo gaa-migoshkaaji'igowaad gegoo ogii-moozhitoonaawaa ji-nishiwanaandendamowaad. Noongom dash gi-maajitoomin mii owe gwayak ji-dazhiikigaadeg inendamowin ji-anokiimagak, ji-aanji'inindwaa awiyag onji bagwaanewigamigong izhi waakaa'iganing ji-wiiji'indwaa gaa-nandawendamowaad.

Niizhwaaki apane, gii-aakwangide gegoo, zhigo anokiiwinan gii-maajaamagadoon omaa onji akiinsing. Noongom dash gi-naazhinaamin gidwaakaa'iganiwaa, gaa-gizhizisemagak zhigo waaskonenjigani-bimide gaa-mazina'igeyeg. Zhigo ndoozhitoomin miikanayan, gikinoo'amaadiiwigamigoon, aakoziwigamigoon ji-onizhishingin anokiiwinan omaa Manidooba.

Ndooshki-maajitoomin Manidooba gaa-ateg omaa akiing – ji-meshkwadoonigeying, ji-niigaanishkamang owe obimaadizii gewiin ji-dibendang gegoo zhigo ji-mashkawiseying mii owe gaa-onizhishing.

Ngii-andone'igemin mii omaa webinige-akiing zhigo ngii-bi-giiwenaanaanig Mercedes Myran zhigo Morgan Harris aaniish inaa awiya wanishing, gi-nandone'waanaan.

Mii ongow abinoojiiyag wedi onji Gaza gaa-gii-nandawendamowaad ji-nanaandawi'indwaa ngii-baakinaamin ninikaanan zhigo ngii-onatoomin aanind miinawaa ndadoopowininaang.

Aazha niibowa ndoodaamin, ambe dash mii owe awashime geyaabi ji-doodamaang omaa atewan onakwayi'ii nininjiinsinaang...

Mii owe oshki-aya'aa gaa-meshkwadoonigeng ji-bimishkaamagak mii omaa Manidooba, ji-aanikoobijigaadegin Kaanada adaawaaganan wedi izhi oshki-aya'aa gaa-adaawewaad, ji-aanikoobijigaazowaad mii ongow maawach gaa-gidimaagiziwaad omaa gidakiinsinaang izhi miikanaang ji-bimisemagak izhi ji-onizhishininig gaa-gikinoo'amawindwaa zhigo odanokiiwiniwaa, ji-aanikoosijigaazoying gakina giinawind wedi niigaan izhi.

Ni-meshkwajitoomin ji-meshkwadoonaagwak mii owe giuwedinong jiimaan gaa-izhi-bagamibidegin izhi gaagimiziwe gaa-ondaadizing naanawayi'ii ji-nagishkodaading, ji-waaskoneseg anaamayi'ii gaa-waawaateg.

Gaaw'n awashime gete-Manidoobayens.

Manidooba, gichi-inendandaa awegwen giinawind zhigo apiichi waasa aazha gaa-bi-izhaaying.

Omaa Manidooba gaa-maamakaadendaagwakin gegoon geyaabi daa-izhisewan.